

Emprest da 250 milliuns

(anr/gc) ler ha la scheffa dal departament chantunal da finanzas, cuss. gov. Barbara Janom Steiner, pudì communitgar ch'il chantun haja fatg ina transacziun – suenter blers onns – da 250 milliuns per in quart pertschien durant da 12 onns. Quai succedia da cuminanza cun la Banca chantunala grischuna e turitgaisa. L'emprest saja vegnì emess e segnà entaifer be curt temp. L'emprest genereschia per il chantun in retgav annual da 414'000 francs, pia en tut la finala 5 milliuns francs. La raschun per quella transacziun reussida saja la solida situaziun finanziaria dal chantun e sia auta bonitad.

Cuss. gov. Christian Rathgeb ha preschentà il cuntegn dal rapport davart «Polizia dal Grischun 2015plus» e

las mesiras colliadas. Quel enserra ina analisa da la situaziun actuala. Las structures polizialas existentas duaian da princip vegnir mantegnidas, siond sa cumprovas, ma vegnir meglieras. Quai succedia tras quatter mesiras: Uschia vulan ins precisar la basa legala cun promover tant sco pussaivel la voluntariadad enstagl prescripziuns, rinforzar las structures regiunalas, promover cunvegns ed optimar la collavuraziun tranter la polizia chantunala e communal. (mira artechel dasperas).

Sco quai ch'il president da la Regenza, cuss. gov. *Martin Jäger*, ha palesà, ha il guvern engrazià a la demissiunanta cuss. fed. *Eveline Widmer-Schlumpf* per ses enorm engaschi en favur dal stadi. Ins haja gi tscherts avantatgs per

il Grischun cun ina magistrata ordnoss chantun en la regenza federala, ma che saja dentant s'engaschada fitg per ils interess naziunals. In post per ella en il Grischun n'hajan ins betg resalvà – tenor opiniun da la regenza – e sco resposta sin ina dumonda.

Sco usità s'inscuntra la regenza cun la delegaziun dal Grischun en il parlament federal avant scadina sessiun. Tar quels inscunters possia il guvern preschentar ses interess e giavischs ed ils parlamentararis render attents a las tractandas principalas. La proxima sentupada cun la delegaziun grischuna a Berna haja lieu l'emna che vegn. – Beneventà ha il parsura da la Regenza era *Luzi Bürkli* ch'è dapi l'entschatta da quest mais nov schefredactor dal «Bündner Tagblatt».